



4 Mei 2023
Joel 1: 11-15



Wari Tuhan nggo ndeher



Joel ngerana kerna wari Tuhan sebage penghitung mundur (countdown) man bangsa Israel guna jera i bas dosa-dosana. Adi bangsa Israel la jera maka itimaina me pengukumen Tuhan i bas wari Tuhan e. wari Tuhan ibenaken alu tanda rehna meriburu labang si ngeradasken kerina ulih juma bangsa e. Erkiteken si e, persembahen ku Rumah Pertoton pe lanai lit, imam-imam seh ku peminpin-peminpin, ertoto dingen erpuasa lah ia kerina gelah ia jera janah la terkena ukumen i bas wari Tuhan e.

Wari Tuhan e me seh paksana Tuhan bertindak ngukum dosa si nggo seh puncana. Ukumen e banci reh bagi serangan bangsa-bangsa nta pe bencana bagi kerehen labang. I bas wari e, kalak si jera i bas dosana ndatken keterkelinen tapi kalak si tetap i bas dosana maka ndatken ukumen. Aminna pe wari Tuhan i bas kitab Joel nuriken ukumen tapi labo banci ilupaken maka wari Tuhan e itamakan i bas terang guna wari si reh ertina lit denga pengharapen. Wari Tuhan sada cara Tuhan ncidahken diri ras kuasaNa nandangi bangsaNa. Wari Tuhan e pe itegasken mulihi i bas Padan Simbaru si mengarah ku bas kerehen Jesus peduakaliken.

Bagi si eteh maka kedungenna pe bangsa Israel labo jera amina pe nggo ietehna wari Tuhan arah pemberitan Nabi Joel. Mbue arah bangsa e si la mediate kerna Kata Tuhan e janah tetap i bas dosa. Wari Tuhan e nggo ndeher janah reh deherna. Mbue denga dahin si arus silakoken i lebe-lebeNa. Metedeh nge kita guna ngelakokensa ntahsa madin siakap tunduh ras nggeluh i bas dosa?